

DEPARTEMENT VAN JUSTISIE EN STAATKUNDIGE ONTWIKKELING

NO. R. 26

14 JANUARIE 2016

WET OP HOËR HOWE, 2013 (WET NO. 10 VAN 2013)

REGULASIES OP DIE MAATSTAWWE VIR DIE VASSTELLING VAN DIE REGTERLIKE DIENSSTAAT VAN DIE HOOGSTE HOF VAN APPÈL EN AFDELINGS VAN DIE HOOGGEREGSHOF VAN SUID-AFRIKA, 2015

Die Minister van Justisie en Korrektiewe Diense het, op advies van die Hoofregter en kragtens artikel 49(1)(b) van die Wet op Hoër Howe, 2013 (Wet No. 10 van 2013), die regulasies in die Bylae uitgevaardig.

**BYLAE
INHOUD****Regulasies**

1. Woordomskrywing
2. Regterlike diensstaat van Hoogste Hof van Appèl
3. Regterlike diensstaat van Afdelings van Hooggeregshof van Suid-Afrika
4. Kort titel

Woordomskrywing

1. In hierdie regulasies beteken “die Wet” die Wet op Hoër Howe, 2013, en enige woord of uitdrukking waaraan 'n betekenis in die Wet toegeskryf is het die betekenis aldus daaraan toegeskryf, tensy die samehang anders aandui.

Regterlike diensstaat van Hoogste Hof van Appèl

2. Enige vasstelling van die getal regters van die Hoogste Hof van Appèl, soos in artikel

5(1)(a)(iii) van die Wet beoog, moet oorweeg word met behoorlike inagneming van—

- (a) die getal appèlle, petisies en hersienings wat daardie Hof hanteer;
- (b) enige waarneembare verandering in die werkklas van die Hof in die drie jaar wat die vasstelling voorafgaan;
- (c) die nodigheid vir die Hof om by 'n plek wat nie die setel van die Hof is nie te sit om enige aangeleentheid aan te hoor;
- (d) die hulpbronimplikasies wat sal ontstaan uit enige toename in die getal regters van die Hof; en
- (e) enige ander faktor wat, na mening van die President van die Hof, toepaslik kan wees ten einde die toeganklikheid en doeltreffendheid van die Hof te verseker.

Regterlike diensstaat van Afdelings van Hooggeregshof van Suid-Afrika

3. (1) Die vasstelling van die getal regters van enige Afdeling, soos in artikel 6(2)(b) van die Wet beoog, moet oorweeg word met behoorlike inagneming van—

- (a) die getal plaaslike setels onder 'n Afdeling ingestel;
- (b) die sakelading van daardie Afdeling;
- (c) indien van toepassing, enige waarneembare verandering in die werkklas van die Afdeling in die drie jaar wat die vasstelling voorafgaan;
- (d) die getal appèlle en hersienings wat uit die landdroshowe in die regsgebied van daardie Afdeling kom;
- (e) die bevolking wat binne die regsgebied van die Afdeling woon;
- (f) die skaal van ekonomiese aktiwiteit in die regsgebied van die Afdeling;
- (g) die uitkoms en impak van die rasionalisering van regsgebiede van howe gemik op die verbetering van toegang tot howe;
- (h) die hulpbronimplikasies wat sal ontstaan uit enige verhoging van die getal regters van 'n Afdeling;
- (i) die nodigheid vir die Hof om by 'n plek wat nie die setel van die Hof is nie te sit om enige aangeleentheid aan te hoor; en
- (j) enige ander faktor wat, na mening van die Regterpresident van die Afdeling, toepaslik mag wees om te oorweeg ten einde die toeganklikheid en doeltreffendheid van die Afdeling te verseker.

Kort titel

4. Hierdie regulasies heet die Regulasies op die Maatstawwe vir die Vasstelling van die Regterlike Diensstaat van die Hoogste Hof van Appèl en Afdelings van die Hooggeregshof van Suid-Afrika, 2015.